

申前請仍不允而令有司以禮慰問至是計聞痛
哭以不得見為恨上疏乞歸守制 上遣司禮監
官吊慰賜白金五十兩禮幣四襲寶鏹萬貫白粲
十石為賻令奪情視事先生再疏陳情優詔勉留
若曰內閣事重卿其抑情輔治以成大孝猶疏請
不已乃 賜敕令馳驛奔喪葬畢即來仍命行人
護行有司營兆諭祭加常制者二蓋寵重輔臣任
賢崇德其異數如此某先生門下士供事內閣又
忝從先生後雅辱公愛方驚悼不能為情願辱命
銘墓其何敢辭公姓楊氏諱春字元之別號留耕

其先楚人元季避亂入蜀遂家新都曾祖諱世賢
祖諱壽山俱不仕考諱玟貴州永寧州吏目俱贈
如公官初永寧公由縣學生應貢入國子監就遠
仕卒于官二子繼沒公時尚幼隨母熊夫人護三
喪歸會苗賊亂出入間道區別外內夜則防衛嚴
密或竟夕不寐雖在逆旅肅如堂室既歸熊夫人
脫簪珥裹葬事指公曰先君嘗言此兒在何憂吾
家不振補縣學生性穎異日記數千言顧弗克得
師自取家舊藏周易讀之晝夜研究閱七月遂食
官廩名頓起成化元年乙酉領四川鄉舉越十七

年辛丑始舉進士時先生已官翰林爲檢討公將迎熊夫人就養以不得請引疾歸熊夫人目已眊至是復明時時趣北上公不忍違居久之 孝廟嗣位乃赴選弘治元年戊申授行人司正前此多叙遷未有徑授者王端毅公爲吏部尚書謂公老成遂授之司正徑除自公始適有旨考察京職公第諸行人履歷合公議行人職掌舊制如冊封宗藩徵聘大臣之類多爲諸司所攝公悉奏復之秩滿耿文恪公畧公上考且語吏部屬曰此吾太學舊門生也知之故真五年壬子丁熊夫人憂八

年乙卯服闋欲乞致仕親友強之出擢湖廣按察司僉事奉勅專督學政過家值子廷儀得鄉舉又不欲出親友復強之乃以四月十有四日上任或謂是日俗當避忌公笑而謝之卒不顧作士以德行為先歲時考校鑒別精當凡所甄賞多捷科第時誦其明歸志素決巡撫都御史暨諸藩臬以試惠留之既放榜即疏乞休致仕又明日遂行時十一年戊午冬也家居越十有八年乃卒先九日立春猶賦詩手封以寄先生又親書二少子讀書規條蓋康寧如常時而旦夕不可作矣遺命祔葬

先塋毋自擇遠地及起高墳毋乞卹恩其訓諸子若孫者皆以義方公生正統元年丙辰十月十一日壽八十配葉氏有淑行先卒贈一品夫人子男七人長曰廷和即先生也次曰廷平鄉貢士曰廷簡早卒曰廷儀太常寺卿曰廷宣亦貢士皆葉氏出曰廷曆國子監恩生曰廷中尚幼女四人長適歸安知縣張一夔次適成都護衛百戶王恩次適郭福次在室孫男十人曰慎曰惇曰愷曰恒曰恂曰忱曰悌曰愷曰悅曰懌慎翰林修撰惇愷恂俱鄉貢士恒中書舍人係女十一人曾孫男一人曰

麟孫卒之年 月 日葬先塋之次墓在縣南

山之原公諒直純厚孝友出天性熊夫人素嚴事之甚謹惟恐意拂竟以養志聞二弟少孤撫教周至皆克成有家女弟遺腹生爲擇今太僕單寺丞麟歸之公所親教士也葉夫人卒終身不復繼室治家嚴甚閨庭整然無敢輕出入者雖諸孫燕見不命之退不敢退子必舉先賢言行爲說雖小過亦不貸嘗曰修身正家吾人分內事居官能推之國與天下乃爲實用先生旣位端揆猶以書諭戒宜以禮法自檢勿侈勿怠勿苟徇人意其諭太

常亦然與人交有信初若難合久乃益爲人所敬
愛接引後進寸長片善稱揚不容口未嘗及人遇
失新都自公始治易其受業者乃相繼取科第不
絕學博而邃在太學時嘗與天下名士即饌堂爲
文會辯析疊疊有據衆咸心服焉四方從游者多
踵接爲顯官志存濟物縣南橋圯鄉人病之出俸
金數百兩修治蜀藩義其舉助成之又患城守弗
完當預爲之圖會慎狀元及第藩臬欲建坊表公
固移以繕城大庇我闔邑之赤子乎城成流賊果
至趨來保聚者數萬人皆得免於兵禍平生不習

術數而言輒奇驗湖湘人往往傳其事以爲神鳴
呼公之福履盛矣今子秀孫旣多且顯魁元卿相
勲業文章並萃于一時公皆及親見之又享高壽
累承封錫麟袍玉帶全歸考終豈惟蜀中無亦天
下所僅見也雖其先世所積深厚然公之純德陰
功宜必大有過於人人者某淺陋媿不能盡述以
示無極乃據公鄉人禮部尚書劉公仁仲狀爲誌
以銘銘曰

楊胄遙遙古多濟美載稱儒宗則自公始公起孤
童學易自躬周經義畫神契心融顯養以正晉孚

以忠 帝曰汝賢汝往督學湖湘舉髦惟汝先
公學有本立教自家家教之成有問曰嘉公之教
士視子不異士之愛公與父一致龍亢鴻儀易象
則然與時偕行其道乃全公亦有言正家最難有
物有恒始厲終安父父子子威如之慶奚必崇高
是亦為政維時宰衡寔公元子為國生賢公功在
此式恭神人矧有卿士亦有諸昆學業是似維子
父構維孫祖繩豈惟魁元亢德世經公封一品公
壽八十生有異數墓有加錫眉山之蘇閬水之陳
彼皆蜀望猶匪公倫蘇不以功陳不以文維公好
德既老益欽堂曰留耕所留者心心田惟良生生
不匱尚世耕之以嗣公志

明故中憲大夫都察院右僉都御史王公墓
誌銘

正德五年庚午江西盜起 朝廷選憲臣有風力
者往治之僉以公舉乃自南京都察院右僉都御
史改都察院奉 勅巡視于時江西大夫士來問
弭盜術公曰在安民既至斥貪吏去苛政民之疆
恃力富恃貲刑恃贖者束手屏氣不敢逞盜聞皆
有向化心大夫士又交歎曰公來晚矣未幾疾作

歸吳江盜遂猖獗不可制嗚呼公不病以死盜且
華面即不化服公必能出方略散遺其衆折其首
惡決不滋蔓三四年餘至調徭獍勤邊帥魚肉生
靈大肆殺戮如是慘也則公之不祿豈特一身一
家之不幸哉公蘇之吳江人曾祖諱 祖諱 父
諱宗吉有士行以公貴封監察御史毋沈氏封孺
人有子四人公其仲也幼倜儻有大志十三補縣
學生浮梁戴公督學政以國士期之弘治二年己
酉以易經領鄉薦二年登進士第授江西道監察
御史福建清軍兼理鹽法時有以同姓被誣爲戍

卒者百餘家淹禁累年公一訊即辯其枉出之軍
籍又多隱漏弊公設法清理歲以千計所領鹽法
課又最於他御史十年出按廣東激揚允當屬部
以下皆望風竦然相戒時劇賊陳光等流劫新會
東莞二縣公畫策不旬月平之南海縣十三村負
固數爲亂鎮巡議屠之公曰茲村戶不下萬餘豈
無一良善者乎玉石俱焚吾不忍也乃輕騎率廣
州知府詣其巢諭以禍福且許自新其父老皆感
泣曰巡按公活我即解散從令公又每村立土里
長以約束之十三村竟無事既而以外艱歸民號

泣追送不忍去服除授廣東道御史十五年出按江西風裁如廣東所至卹民隱作士氣表先賢祠墓董鎮守怙勢凌侮縉紳至匪盜賊不以聞人莫敢何問公首劾其不法數事 上切責鎮守且以治盜事付公公嚴督有司遂擒盜魁 賜敕獎諭時天旱種不入土公親錄繫囚釋其所當原者數百人翌日雨是歲有秋又善斷疑獄民有女奴自逃其讐指爲故殺訟于官者獄旣成公覆訊見其有冤色使人密訪女奴所在得之民得不坐又有大家被盜因誣其所然者賂鎮守欲置諸法公察

其誣出之鎮守怒衆亦以爲疑後真盜出始皆愧服以爲不可及民爲之謠曰江西有一哲六月飛霜雪天下有十哲太平無休歇至今論巡按之賢者必以公爲稱首云十六年陞山東按察副使守備臨清舉持綱領不屑細瑣民安之夷人入 覲私市鹽罔利事覺公謂不治則廢法治之則非所以柔遠人乃請沒鹽于官仍給其直與之時逆瑾初橫中貴人有忤瑾斥南京者道死臨清公置棺埋之人爲公危公不卹也正德三年改任本司尋以撫按交薦可大用遷廣東按察使未幾進南京

都察院右僉都御史領操江事公言操軍脆弱異日有警必不能支其後流賊弄兵江上果如公所慮五年有江西之命再改巡撫其病也實以憂勞所致北歸猶日以江西事爲念逾年病且愈吏部奏將起用而公不可作矣時九年癸酉九月二十日也壽五十有七生平孝友樂於周恤於書無所不讀尤熟於史喜誦讀好書說好話行好事作好人之詩顏其所居曰好齋有好齋集十卷配申氏封恭人孝儉慈惠嘗以公無子爲公卜妾於諸子又撫教如已出宗姻稱之先一年卒子男五人曰

京曰東縣學生曰家曰木曰木女三人長適吳涵鄉貢士次徐勳國子生其季尚幼京等卜以年
月 日葬公玉山先兆之次以予爲公同年知已乃以都憲徐公源狀走价京師乞銘予爲誌其治行之大者如右因憶曩歲公來自江西爲予言江西都司有以賊革任者福建林公俊來巡視復用之公不可林怒移文語侵公公不以介意且諭三司以林公先 朝名臣處斷必不苟意者爲申稟不詳所誤且令再具事本末以請林見公直而遜大悔悟即罷其人弗用因重愛公比歸賦詩贈

別送之數程此予所親聞者而狀不及則公之嘉言善行遺逸者多矣予于是重悲之乃銘曰

好哉王公靈秀所鍾直道宏才光于憲臺人亦有言四方言官各有體孰撫孰按各臻于理人亦有言四方殊風孰北孰南感頌一同公幼有志所志維好維民之望維國之寶西江不云用公不早公往巡視亦既大受勿藥無期其又誰咎希文不相賈生無年維昔則然吁嗟乎天

明故資善大夫南京戶部尚書致仕贈太子少保高公墓誌銘

公卒之三年其子兵科給事中滂始以卹恩請于朝特贈太子少保賜御祭命有司營宅兆寔正德九年甲戌春也滂時以使事道揚乃以乙亥月

日奉公及夫人之柩葬于城西馬鞍山之原先期奉吏部文選郎楊君果狀來請銘公吾鄉先達滂又雅與予善義不可辭按狀公姓高氏諱銓字宗遷世傳為媯州人宋歸德節度使懷德之後至千六者為鎮江安撫使因家鎮江國初時高祖明遠舉人才為勸農官始徙江都棄官以醫隱再遷懷寧會祖永仁復家江都祖友直父亨皆贈通

議大夫都察院右副都御史公成化己丑進士初授大理寺右評事丙申擢山東按察司僉事遭內艱戊戌服闋改浙江又遭外艱庚子服闋再改河南弘治戊申陞浙江副使壬子陞河南按察使乙卯陞右布政尋轉左丙辰擢都察院右副都御史巡撫保定等府兼督紫荆等關庚申陞南京工部右侍郎癸亥進南京都察院右都御史正德丙寅今上擢爲南京戶部尚書會逆瑾專橫不悅公雖致仕猶銜之不置又致詔獄無何放歸猶撫他事褫其官庚午詔以前官致仕中外方冀公再用

而不可作矣公初娠時太淑人嘗感異夢比生岐疑不凡甫毀齒日記數百言十三能韻語天順丁丑補江都縣學生少保高文義公一見竒之吏部王端毅公知府事擇諸生俊秀者親訓於資政書院尤器公其在大理潛心條格上疏言優致仕申比附分贖職杜誣詐辯盜情廣收贖六事皆中時獎出錄福建囚平反至百餘人會勘其勢家大獄不爲私撓人服其介其在河南值歲歉人相食朝廷遣大臣往賑公實分領其事驗丁口程遠近以時給散吏有侵剋輒嚴禁之雖有憑附者亦不

貸流移四集處其食息咸有方旣而疫作乃請給衣糧散遣之又爲叢冢以處死者所活甚衆歸德有黃河退地千餘頃爲親藩所據州守且以負租被訟朝命中官侍郎都御史按之公謂負租宜當其守違制罪地則請還民爲業中官怒出惡語脅之執不變後他藩亦不以河退地請其官長私計于長使欲分其半與之公又執以爲當還民民竟賴之其在浙江攝司事清案牘群吏屏息勾考戎籍宿弊盡革其在河南爲按察風紀振肅如在浙江河決張秋命官浚治公建治河十二議

贊畫居多賜白金文綺爲布政尤號得體會入覲吏部奏公治爲天下異等其巡撫保定立九則編徭役慎固邊圉時奸人有獻皇莊者實皆民田侍郎許公進等奉命會勘冤聲撼野至歐州縣吏不得行許遽欲執以復命公曰若是固爲民至意思萬一不測如民重得罪何請勘實以聞上雅愛小民必不忍奪其生業以利左右奏上果然其在南京工部江淮饑復領賑濟所活亦衆陳荒政八事多行之其知院事獄精允人以爲不冤爲戶部改衛士廩米折色每月兼給著爲令其

於名節尤刻意不苟始仕時或勸增年以就科道
選亟謝不可及爲僉事歷三臬經九載四薦乃得
遷脫罹逆禍亦無幾微見言面人以是尤稱之家
居孝友仲兄病嘗密以身禱既仕節俸入以爲壽
儉約自持不喜飲博自謂治律之功不減治經經
史外星卜醫藥諸書無不涉獵既老猶然儀觀修
整尚禮讓鄉黨雖小吏來見亦束帶送迎與爲禮
於後進名士推挽惟恐後人以急告未嘗不爲之
盡然不自德也始號平山晚更號遺安老人所著
有平山遺安稿若干卷壽六十有九配許氏同鄉

處士某之女累封夫人事舅姑以孝舅姑宜之愛
育諸子能不廢教於諸姪亦如之先公一年卒子
五人長淇七品散官次即涉許所出次汴次淪次
注少室杜出也汴淪皆縣學生女二人長適禮部
主事仲棐次適張儉孫八人長本以蔭補國子生
次桂樾楨楠柎柯孫女九人長適蕭瑤次俞相
皆國子生餘在室曾孫男一人銘曰

高望宋世代有顯人于潤有家安撫是因安撫有
後始遷于揚再遷懷寧託醫以鳴會時幾何卒復
其始食德收功曰維孫子平山之生鹿降自月天

固生之夢吉斯協孰光賢科孰望理寺孰臬孰藩
載長載貳載轉都憲載涉民曹留都重地邦計心
勞曷以治官治律如經維辟維宥罔不當情無妄
之災君子亦有不懟不渝君子之守卹恩載承維
皇孔明賜葬與祭賜贈以榮天既定只可以觀德
公德不匱百世是則

封太孺人孫母吳氏墓誌銘

吾友都憲東沂陳公德卿每爲予道其外兄孫翁
彥深之爲人蓋積而能散者比歲嘗歉翁出粟賑
濟所活數百千人于時其內吳孺人同心協志分

命臧獲子姪採薪汲水燃火煮粥各司一事晝夜
躬自督視罔怠若治其家事然者東沂於人慎許
可獨丞稱翁如此其必不我誣矣正德九年四月
十一日吳孺人卒其子讚乃懇東沂介其孫繩請
予銘孟城密邇吾潤又重遠東沂意且知翁與孺
人行誼可銘也遂不克辭孺人孟城世家女封徵
仕郎府軍後衛經歷孫翁彥深之配河南鄆陵縣
知縣讚之母以讚貴勅封孺人幼有至性不妄
言笑旣笄歸翁事舅姑能得其歡心家人宜之姑
嘗遘疾危甚醫藥罔效孺人焚香告天請以身代

姑疾尋愈鄉人以爲孝感所致生子二長讚也次
誥以恩例爲七品散官女二李端縣學生陸夔其
壻孫男六長繩禮部鑄印局生次綿紹緒餘未名
孫女四曾孫男三蓋見於東沂所狀者事多可書
以常行不書書其孝感一事非常行也嗚呼是亦
可以永孺人之傳也已矣銘曰

孺人吳姓從子封早歸徵仕家已充孟城令族稱
孫翁好施式有前賢風淑哉內助心志同姑病不
起禱以躬孝誠一念感彼穹篤生二俊親磨礪伯
也宦達奏厥功其仲在野仍章縫錄名儀部算法

通一孫穎出五尚象生封死塋備始終茲維顯道
非偶逢幽堂刻銘傳無窮吾徵吾友東沂公

中順大夫江西南康府知府致仕沙羨王先
生墓誌銘

嗚呼此致仕南康知府沙羨先生之墓也初成化
乙巳先生以名進士來知丹徒時予少且賤先生
識拔於諸生中遣其子璿受學每延至私第盡用
大賓儀言必稱先生嗚呼達官貴人不下士久矣
先生獨忘勢如此雖予非其人其襟度可易測哉
後予官翰林先生入爲太僕同朝數年禮無所加

焉嗚呼古所謂知己者若先生非其人邪乃不幸
竟抑鬱以卒吾忍不銘先生姓王氏諱溥字公濟
沙溪其別號也先世大名人其家武昌自元萬戶
曾祖諱柯者始祖諱朝宗父諱彥成賢有惠政仕
至四川布政司參議公貴從高階例贈朝烱夫參
議公元配戴氏生子海早卒先生賈出也賈亦濟
寧名族女俱贈恭人先生幼業詩經以武昌府學
生中成化辛卯鄉試甲辰登進士時費楠菴先生
方爲國子監祭酒爲卿縣求良尹薦於吏部遂有
是命先生蓋補菴門下士也事至輒斷庭無留案

屢爲撫按所旌居六年徵爲太僕寺丞上安邊十
策時洛陽晦菴劉公在內閣亦以門生知先生薦
守河南府能聲益著然自是亦爲人所訾毀五年
改守南康論者猶不置遂致仕歸閱八年乃卒正
德八年四月八日也壽六十有六娶魏氏封安人
子二長璿魏出也次璣女一尚幼男孫一曰澤民
國朝當成化弘治間海內並推文宗若古歐蘇者
則今致仕少師兩涯先生李公今少傅邃菴先生
楊公與故篁墩先生程公其人也先生在四川與
篁墩俱以岐嶷知名蓋已嶄然見頭角矣及歸湖

廣邃菴公爲場屋友相得甚歡比來京師又因邃菴公往遊西涯之門公亦愛而禮之先生穎悟出人博聞強學凡天文地理曆數星命諸書無不通曉善真行篆隸大字詩畫清逸尤妙得琴法用是館閣諸縉紳凡出遊及文字會飲必欲得先生以爲歡每一告歸省爭賦詩款餞名傾一時議論慷慨視天下事若無不可爲者人之期公與公所自期皆遠甚使官人者愛惜保護處以清銜散秩或翱翔侍從間無簿書塵俗奪其力得充其所志則雖古之名流韻士鼎聲後世者亦何上焉天之生

才不易而用遺其方則併其所長而棄之可惜哉惜哉先生天性孝友事賈恭人能色養弟瀨庶出也自襁褓撫教卒底于成連爲娶二婦未有子又爲之置二妾推衣共食白首如一日爲政崇風教在河南請立范文正祠置墓田給其子孫雅尚誼氣重然諾與人交輒吐露肺腑不設城府親知有以急難告者揮金如土雖傾囊不吝襟度灑落不戚戚于得喪旣謝事歸日登眺佳山水以嬉藩臬諸公有過候者抗視無所遜武昌守屢請爲鄉飲大賓亦不拒也生平不計生產其歸也囊無餘貲

至沒不克葬閱三年璿走京師謁邃菴公請為墓
表及請予銘乃克歸卜月日以葬墓在山川
壇東賽湖西岍祖葬之原銘曰

驂騮撓渠局于戎車丹砂空青乃薦朝廷莫邪干
將抵以割羊用遠其長雖良弗良吁嗟乎生才寔
難惟器是使世靡遺士並受其祉我銘公藏豈惟
公傷公有孫子慶其在此

故封文林郎翰林院編修陳君墓誌銘

封君姓陳氏諱輿字朝庸號竹坡南京翰林院侍
講學士霽之父也初弘治中學士為編修奉詔教

內書館邂逅逆瑾不為禮又以危言侵之瑾怒紛
辯詞色厲甚竟不屈四壁盡驚瑾銜之比用事遂
矯詔令致仕憾猶不已至遣邏卒廉于蘇無所得
會為仇家所誣事下御史勘究又遣邏卒偕來乃
鍛鍊成獄舉家憂怖禍且不測君不為動曰是有
命在無何瑾伏誅事乃得白當是時人徒知學士
之直名勁節光于詞林而不知君之臨變有執其
賢于人人亦遠矣陳之先本汴人宋南渡時有為
學諭者來居蘇蘇之有陳蓋自學諭公始其後世
以貴雄為聞家曾祖諱鼎祖諱永昌考諱範俱不

仕妣鄭氏君少穎敏喜涉獵書史既長有克家才
略力田飭蠱積四十餘紀業乃大豐然不以自肥
好推以濟人每歲侵輒出穀賑貸又不以聞于有
司吳中嘗大水有詔出粟六百石者表其閭君首
應詔時時施糶以周窶乏友人陳某卒無嗣君并
其母若子三喪葬之焚券棄責他不可一二數也
雅與里儒許某善許歸自成所孤貧不能家館穀
之終身又買山葬之先塋之側曰吾子孫歲時上
塚當識吾意其鬼不餒也教子甚篤日以植學礪
行是訓尤鍾愛學士親督之治舉業從徃郡中亦

携與偕比宦顯訓戒絕不置弘治戊午封文林郎
翰林院編修既而書以家政付諸子曰葺池館速
客觴詠凡遇春秋佳節輒游名山水以嬉襟度儻
然人以為稱其號云生正統癸亥夏六月辛丑卒
正德甲戌秋九月癸未壽七十有二配徐孺人先
卒子男五人曰震恩例義官曰霽即學士曰雲亦
以恩例授迪功郎曰雷府學生曰霽震霽俱已卒
女二人歸 孫男七人適遠述遇遜滬迨女三
人會孫男一人女二人卒之明年乙亥 月 日
將舉君柩于胥山青銅塢祖塋與徐孺人合葬學

士既解任守例當領守制公牒于朝自爲行述
請予銘予與學士同在翰林院又同鄉也遂爲銘

銘曰

吳中石湖山水奇粵生才俊文譽馳如彼鳳雛五
色儀翱翔覽德來天池又如瑚璉如璋珪南都學
士望所歸曾藏經濟未易窺有開必先先者誰家
有嚴君如嚴師君也好逸亦好施義方之訓還書
詩以直質禍非我悲君不求知天則知詞垣史職
皇封賚我銘幽堂揭衆迷有來繫繫繩祖規

明故封南京翰林院侍讀學士吳公墓誌銘

正德四年己巳閏九月十三日封南京翰林院侍
讀學士宜興吳公卒公之子克溫即其家遣倅賫
持邵副使用之狀屬貴爲銘貴與克溫爲兄弟交
雅屬公知嘗拜堂下見公長身脩髯丰神凝遠適
與德稱宜登期願而遽以計聞其忍以不敏辭邪
公姓吳氏諱經字太常別號味菜世爲宜興巨族
曾祖德明妣周氏祖以中贈戶部員外郎妣湯氏
贈宜人父玉戶部員外郎妣徐氏封宜人戶部公
質直而文人推爲長者公其仲子也幼以穎敏爲
戶部公所篤愛遣受尚書於莆田顧孟喬氏孟喬

甚器重焉太師徐文靖公時爲編修見而喜曰此
吾鄉逸少也遂以其女弟妻之比歸入縣學名益
起然每試場屋輒不偶旣而克溫以公所講授者
登進士甲科官翰林公始充貢有謂公當得封勅
阻其上禮部者公曰吾不可不一面吾君事已卽
歸又有勸其留太學以待用者公曰吾不能久違
吾親蓋是時徐宜人年踰八十公年亦望六十朝
夕侍側承歡戲綵若嬰兒然徐宜人悅視公亦若
嬰兒然者忘其年之老也正德改元克溫以史事
徵時逆瑾方橫公憂之屢貽書以速進爲戒比忤

瑾致仕歸公顧喜曰兒爲吾榮多矣吳氏業嘗中
落戶部公沒時田僅百畝又以分給兄弟公夙夜
劬力田簡費卒致饒裕然自奉以約疏食布袍
終其身不變又樂於周濟無間疏戚各副其請雖
數有負者卒不以自懈鄉人賴焉家訓嚴甚擇師
必求名士夜課諸子誦讀親坐臨視旣有疑義輒
爲講解其未勝冠及業未成者不許衣帛食肉其
有服涉華侈者輒手裂之諸子皆奉教惟謹生平
寡嗜好屏聲色日惟手一編以自娛至老不衰善
論事成敗每援古昔爲斷曰後當然竟無一不如

其言非其人，不與交。既交，輒傾肝肺。晚與沈司空時暘輩十餘人爲真率會，皆一時名勝。云公以子貴，再封至今，官得壽七十有五。配徐氏，贈少師兼太子太師、吏部尚書、華蓋殿大學士。之女即文靖公女弟也。繼許氏，春坊贊善某之孫，皆先卒。子男三人，長儼，即克溫翰林院侍讀學士，以文學行誼重於時。徐出次儉，許出次太學生儔，女一人，聘沈勅孫男子三人，長驥，次駟，次驂，女子五人。任行華，俸徐文炯，其婿也。餘尚幼。公孝謹儉勤，開明朴易，家食不售，識者憾焉。比克溫落官歸，人咸以

爲對而公獨怡然。憲之俾遂厥志，迹是而論，使得爲世用，其所建立，又豈譎譎齷齪者所能倫哉！公沒後數月，瑾敗，朝廷起克溫復其官，而公不及見矣。克溫卜今年辛未十一月二十六日甲子率二弟塋公篠嶺祖塋之次，銘曰：

戶部揭揭鄉國之哲，封君承之，俎豆書詩，卒復其始。是父是子，學士鞞俊髦，先覺孰倡于前，封君則賢璜所蔽，黼是子是父，胡畸其逢，弗試以庸，櫛墜隆荆溪溶溶，有來必豐，慶源所鍾。

明故戶部尚書致仕進階榮祿大夫偕公墓

誌銘

公致仕之明年我 聖天子即祚建公階榮祿大
夫又六年足疾作遂卒于家寔正德辛未十一月
二十五日也計聞賜諭祭再命有司營葬事於是
公孫壻中允李君夢弼狀事行介其子璞過予以
治命請銘噫予辱公知公銘予奚忍辭按狀公諱
鍾字大器號獨山其先清豐人曾祖諱得甫避兵
徙鄆城祖諱伯祥父諱良善俱以公貴累贈資政
大夫戶部尚書祖母張氏母范氏俱夫人天順六
年公以書經中山東鄉試成化二年舉進士觀刑

部政五年授浙江道監察御史都御史黎陽王公
越特薦御史四人可大用四人者今致仕吏部尚
書屠公瀟工部尚書楊公守隨故僉都御史王公
濬及公也十五年陞大理寺右寺丞轉左寺丞十
八年進本寺右少卿明年陞右副都御史巡撫保
定等府兼提督紫荆等關二十一年陞刑部右侍
郎丁母憂還漕運王總兵遇諸漕河以公簡已乃
以事中公謫知雲南曲靖軍民府弘治二年服闋
改徽州府其年冬陞大理寺左少卿三年陞左副
都御史巡撫蘇松等府六年陞戶部右侍郎督倉

場等還理部事八年改吏部右侍郎轉左侍郎十
一年陞右都御史十三年陞戶部尚書在部四年
屢以師出給餉勞賜綵幣白金嘗以疾在告命醫
診視中官禮問於家賜內醞諸珍物尋請老溫詔
慰留不允十七年再以疾請乃允之仍命馳驛還
蓋異數云公白哲長身不妄語笑剛毅諒直夙夜
惟勤初爲御史時奉 勅巡兩淮鹽中費用事者
道淮勢張甚獨抗不與見名頗起其按應天等府
清揚濁激犁然當人心又同巡撫大臣賑濟民不
孱死其按浙江亦然浙巨藩事尤劇公不遑自逸

凡行臺亭榭舊以備遊眺者悉封不視致仕兵部
項尚書嘗爲鄉人誣奏禍叵測公承命與中貴人
讞之白其寃項宗獲全海鹽海岸崩工久不就公
令所司以荆器實磚石先塞旁流工乃成夏旱不
雨公禱雨三日鄉宦夏大理時正輩作詩頌其功
其監秋試場默黜舉子之私以賄請者而不暴其
名曰毋以一人玷我賓興盛典黎陽公旣重公比
還朝乃悉以奏牘委之論列益無避忌巡撫遼東
都御史馬公文昇亦爲用事者所惡風公劾之公
不可由是恨益深無何被廷杖或以爲用事者所

諧公執益堅卒不屈其在大理大同有虜警命撫
安真保等府民果安其巡撫保定却守關者餽金
請禁木以固邊陲保障復海濱淤地舊爲豪右占
種者悉還之民其在江南日以擇廉吏禁侵漁爲
阜財要務歲值滂公條寬恤事請允之旣而滂復
甚又條奏九事不報時特遣廷臣齎內帑銀賑杭
嘉湖三府水災公因上疏理前奏且言蘇松與嘉
湖杭三府均之赤子也賦稅之出蘇松重於三府
水災所傷三府輕於蘇松今三府乃蒙賑恤而蘇
松之民何獨不一蒙恤念乎又奏設高淳縣以分

治溧水民便焉其在吏部進退黜陟一視輿論即
有所薦亦未嘗令知以爲恩其在戶部振刷宿弊
事無滯留嘗以四方多災報乃疏重京儲慎庫藏
實內帑省公應度邊餉清鹽法均禁例計芻料節
香蠟戒措尅處存留恤災傷十二事以聞於時政
多裨益焉又以九門內臣職譏察不可令干國課
疏累上必得請乃已時貴戚有丐長蘆兩淮鹽引
者旣得旨又執奏乞寢成命以杜將來又請裁冗
食以紓國用其餘因事納忠率多人所難言公見
報罷漸多乃復上言其略曰臣曩言二三事皆爲

國計未蒙批答伏乞宸斷凡臣章事于貴近者亦乞施行以通下情上聽之嘗創板庫以儲羨餘諸司由是有所稽覈比去積多至若干萬然怨者彌衆而謗言興矣公居家孝友憂國之誠根于天性晚雖謝客日以書史自娛至語及時事輒鬱鬱不樂屬纊時諸子以後事請不答但云天下事大可憂而已於戲若公者其無愧於古之所謂大臣者乎壽七十有二娶王氏繼馬氏劉氏皆贈夫人子男五人長珩早卒贈歸德州判官次璞鄉貢士能以學行世其家次瑞次瑤次琨女四人國子生

朱堯佐高栢生員賈珍李邦幹其壻也孫男四人汝睦汝勤二未名女六人長適李廷相即中允次適生員高驎侯功李世恭公沒之明年壬申月

日璞等卜葬于城南大豐鄉之原亦公治命也

銘曰

國有元氣時維直臣山之虎豹世之鳳麟彼巧宦者其誰齒論孰可曰直公也其人公按兩道肅乎雷霆洗冤摘伏奸回震驚公撫兩畿温然陽春煦之育之倪毫輯寧公貳冢宰鑑空衡平屏遠儉壬登崇俊英公爲計相冰玉潔清裁厥匪頒歸於法

程孺其言蹇蹇其身我躬不有我官足珍維執不
渝萋斐是嬰弗什弗傾 天子聖明命以考終葬
以恩成詎云孤直終始哀榮嗚呼獨山厥名稱情
仰止弗諼沒世其生

承事郎杭翁墓誌銘

予嘗聞壽工部宗魯往時客死通州其館人憫焉
買棺斂之若喪其私親然又以其母其孥之貧而
不能家也且厚其贖歸之心竊多其義而未暇究
其爲誰何比日予門生趙戶部鶴狀其鄉人杭翁
事行而介其子來請銘墓予得而讀之乃知翁即

其人也嗚呼翁其不謂之侗儻尚義士哉或謂宗
魯達官也翁之爲此蓋將以鼓譽于達官之疇以
自寵也是惡得爲義夫君子與人爲善亦惟迹其
已然者錄之而已不當逆計其心而閉其進善之
途也且若而言則有爲而爲義者不知取將遂取
夫無所顧忌而甘於不義者乎是固不得以是病
翁翁揚之泰州人也諱琮字廷瑞厥考忠幼携之
來戍神武中衛今故遂爲通州張家灣人翁居家
孝友伯仲協和堂構靡懈旣裕矣則又日出之以
施予自其宗姻鄉閭以及浮圖老子之徒莫不賴

焉歲嘗大疫翁作百棺以分葬其死而不能葬者
又嘗有漕卒失官銀二錠購得其半以不足償懼
其欲覓死翁見而憐之即如數周之率賴以生其
平生所爲又多類此以是觀之翁其義邪非邪有
所爲邪無所爲邪抑或其鍾于天者獨然故雖莫
知其然而適能契其然邪然視彼積而不能散者
賢則遠矣翁本習戎事欲取功勳數奇無所就又
耻于倖進故惟以恩例授承事郎獲有章服子一
人曰轍亦以恩例今爲神武中衛左所千戶配倪
氏出也孫一人曰熙銘曰

日維既望月在丑蒼龍於時集辛酉我新阡神
所授翁也藏此非丘首誰狀翁者盾之後其人有
文言不苟翁壽七十孰云壽我作銘詩翁弗朽

大行人敬之徐君墓誌銘

君諱欽字敬之湖廣黃州府黃梅縣人父用嘗爲
太學生有時名然卒窮死太學君其長子也年二
十四舉進士登第授行人爲行人七年嘗三使親
王府以能清慎著聲譽去年冬十二月十四日卒
於京師實弘治辛酉也得年僅三十五初君父太
學公卒予嘗爲之銘其墓意其委祉在君而君固

行修職敏衰然吾榜之巨擘也今乃不幸短命齋志而沒悲哉天之意于是吾不知其何爲也君沒之旬日君同鄉侍御袁君大倫過予以銘墓爲請予弗能爲辭之後數日雪大作道途寒不可還往而君子邦貞才十餘歲乃能從一老隸持侍御君狀獨走吾門泣拜而請曰茲銘敢託於執事匪直我袁丈意亦我先人九原之望也其言酸楚有不忍聽聞者予竒其幼而能子因復問君家事乃知尚有二稚皆聰慧不凡嗚呼天之所以昌徐氏者或者其在茲乎君娶吳氏賢實配君君沒喪之無

遠禮吳氏實主之銘曰

累積而屯其發在君君復止此在君之子淳之淵淵其流涓涓久則沛焉君盍不然吾徵諸天

贈文林郎新城縣知縣段公合葬墓誌銘

今年春戶部段主事敏母太孺人卒于京師貴暇往吊敏慟絕伏地不能起久乃言曰不肖固有請于子也往時先府君卒敏弱不克事墓銘未有刻今不幸吾母背棄將合葬願吾子錫之銘以少蓋不孝之愆敏爲貴同鄉人且同舉進士相好也貴固愧無以相其哀乃不忍以不文辭翌日敏遂持

其姻儲主事子充狀來速銘乃序而銘之序曰公諱錦字克成其先汴之祥符人在宋有曰伯三公者公十世祖也業儒而寄迹于醫值靖康變挈家南遷始居金壇邑之有段氏蓋自茲始其子曰康年克肖厥賢與實齋王正肅公漫塘劉文清公諸名碩游能以惠利及人人德之自是遂爲金壇之望公祖曰觀醫學訓科父曰瑞早卒公五歲而孤母馮育而成之慎行遜言與人無所競馮孀居四十年公事之克盡孝道時其寒燠而調其服用遇有疾輒憂滿顏色竟夜皇皇不能寢鄉人以是稱

之年四十五以成化乙亥五月二十三日卒後四年葬其縣南朱塔村東新塋太孺人姓黃氏常之宜與名族質柔而靜性慧而恪年廿有一而歸于公能以孝謹媚于其姑尤勤中饋事身必先之及公卒始亦繼奉敏幼家無紀綱之僕孺人親任其勞每歲經畫卒無大廢禮者旣而敏舉進士補新

城縣今再改廬陵以清白自勵其奉有人所不能

者其母以是賢敏敏輒曰此非吾所能每母之教

然也敏官戶部乃迎孺人來就養所一年其母則

今弘治壬戌三月十四日也年六十八

多長德爾得旌與公用是贈文林郎新成縣知縣而太醫人以銅存故獲今封初公無子其後有子二長曰文次曰敏其次也幼育于公以爲後後敏亦有子二曰復孫曰吉孫而文卒無後敏乃以復孫後文以奉饗祀嗚呼積善者有慶而封君夫婦其所值乃如此何邪敏才而有禮二子皆不凡天之意固有在邪銘曰
嘉其匹厚其積乃薄其食于嗟天乎匪人力歛其羸維後之成維吾銘之徵

封宜人石母王氏墓誌銘

監察御史石允升比按東廣走驛馬以疾來告允升吾友也壯而才子竊訝之無何其母宜人之訃聞而允升亦來復命因叩其詳則知其以宜人故也初允升便道歸寧以母老難別宜人曰爲官之道我雖不知然爾父事則吾見之審矣爾父爲給事中時嘗發曹石諸凶奸惡人多危爾父而爾父弗爲變夫死生爾父弗恤也而何以離別爲哉爾第往澄清一道毋忝爾所生則爾在萬里外吾猶左右也允升乃強勉赴廣已而心忽忡忡若有大戚在厥躬者疾遂作計其時則宜人捐養之辰也

嗚呼亦異甚矣允升自爲狀且懇予銘墓予安忍
辭宜人姓王氏滁州人故奉直大夫鴻臚少卿公
諱澄之配以公貴封宜人壽七十弘治十四年十
一月廿九日卒 年月日祔公墓子三人長柱州
學生亦有文行次棨即御史次林孫男六人繼芳
繼英繼儒繼登繼魁繼先孫女一人歸劉九成其
已具冢宰王思菴所爲公誌者不著銘曰

侃侃鴻臚維時良臣履貞秉直忠不謀身誰其配
之王侯之子載穆令聞動循轍軌來嬪于石宜其
家人名矣宜人名稱厥情石有祖姑寔主內政畫

爲家規一我衆姓中饋分治各有日時吾婦吾孫
咸遵指麾宜人代姑身亦勞只娥姑逸心則安矣
豈惟于姑于妣我甘代之勤勩孰計祖曰孝
婦肖于爾姑不有是婦曷配爾夫維公鴻臚起家
進士周旋諫垣爲 帝所喜 帝之所喜衆之所
仇庶卿淹留豈我之羞我躬不恤調恤我私我置
我家宜人自持持家如何如厥祖妣和之以恩臧
獲咸救勤以事事儉以助廉無侈無華中心自厭
宜人謀家如公謀國夜寐夙興不遑自膏宜人事
夫如公事君豈惟媚之肅如嚴賓官則成矣志亦

行矣贊公歸休我則寧矣公無遺帑遺以三孤我
教我育我衣我餽我始正之今則成之爲士爲官
亦我令之人亦有言幽閑貞靜無非無儀宜人之
性人亦有言坤道代終相成厥家宜人之功於維
宜人厥積孔厚有封有年福亦多有異其羸餘以
錫爾後豐山之原鴻臚所阡宜人柎焉在禮則然
雙辟沉淵有光燭天太史作銘百世其傳

南莊居士夏翁墓誌銘

嗚呼吾忍銘吾翁也夫翁吾妻之祖也其行率與
古合吾嘗以爲吾故鄉之典則猶在而今則已矣

翁又不幸老而孤此猶足悲者嗚呼吾忍銘吾翁
也夫吾友壻刑部郎中劉君美之曰此翁治命也
子不銘翁之目且不瞑于地下嗚呼吾亦奚忍終
不銘吾翁也夫翁姓夏氏諱英字文傑南莊其號
也鎮江丹徒人 國初徙實京師至翁再世矣家
東市中性超卓無世俗習氣事親以孝聞親沒祭
之致謹如生存至老不衰凡遇時物必獻而後嘗
曰吾不敢先吾親也屢賑宗族雖數不厭曰吾不
忍吾親之後之窶也姪亨七歲失怙翁子之慈而
能教卒爲善士克其家見其舉子輒喜曰吾夏氏

之鬼不餒矣此固吾孫也翁家政甚嚴造其庭肅如官府入其中堂寂不聞女婦聲凡巫媪販婦過其門屏不許入曰敗人家法者此輩也翁重意氣立然諾周人之急揮金不計然疾惡人太甚見惡人輒怒見顏色不與交一語里少年有不檢事惟恐翁聞知好面折人過是是非非雖貴人無所比表裏洞徹人以是憚之亦以是愛之咸尊曰鐵翁鐵翁亦因是以爲別號云翁樂與縉紳游縉紳聞翁風亦樂與翁游因而通家者有之故禮部侍郎費公亦翁之鄉人也尤重翁曰此布巾中汲長孺

也翁弟俊早卒婦吳守節不貳卽亨之母也子泰亦早卒無子三女俱幼婦趙甫二十餘尤苦節自勵雖親姻鮮與之面歸寧未嘗踰時皆翁家法也吾始宦喪吾妻謀繼室于吾鄉費公乃舉翁之女孫歸焉吾以是知翁獨深翁卒于弘治十六年五月十五日壽七十九配宗氏繼楊氏南京江陰衛指揮使海之女善理家翁嘗輸粟授七品散官不以稱非翁志也銘曰

世有足貴非人爵之謂家有所傳不必我出者爲賢嗚呼南莊吾於翁乎奚傷

明故大中大夫浙江叅政李公公合葬墓誌銘
浙江叅政李公叔恢既葬之四年其配封恭人延
氏卒子晞乃自狀事因吾壻費玄泣請予銘且曰
先君葬時晞病不能事事幽堂之銘未有刻今不
幸母捐棄將祔葬敢以先君不朽之託懇于執事
晞玄之父故禮部侍郎補翁費先生壻也嘗聞先
生誦公德政因追道其父都憲公風節予竊慕之
思與公定交而公已不可作矣晞還往吾門甚習
謙慎文雅可念也銘固不得辭按狀公姓李氏諱
德恢叔恢其字別號節菴其先湖廣荊州人因宦

東安家焉高祖士瞻元翰林承旨封楚國公會祖
繼本翰林檢討祖東國初爲行人司副卒贈太
僕寺少卿父仇都察院僉都御史母張氏封恭人
都憲公仲子也生用族能卓然刻意問學都憲公
鍾愛之舉成化己未進士授大理評事讞獄有平
允聲與中貴用事者抗廷錄死獄有疑者力排衆
議辯而生之屢陞右寺正丁外艱服闋改左弘治
元年陞知嚴州府嚴俗好訟公善聽無所枉屢決
疑獄發摘如神人由是畏憚無敢妄訟者然不恃
以爲理興利革弊惟日不足下至征科解納凡舊

法未善者輒更之罔利者無復售其奸民素不諳水利惟以祈禱爲旱澇計公始教民開池塘治溝洫由是旱澇不能爲災自桐江至富春凡百餘里牽舟者行山巔巉石間往往墜死公始開築道路爲梁橋以濟不通行者便焉尤尚禮教文廟殿宇歲久而圯公捐俸倡衆新之其祭祀樂舞生冠服及樂器皆創造如式暇則躬課諸生校其文優者厚其禮以激勸之增新漢隱士嚴光釣臺祠宇訪其後裔復其家以奉祀事富民往時以季春三日會廣濟廟爲社競侈因而諂神惡少年或乘之爲

諸不檢事禁之亦自公始在嚴八年御史以其政旌異者五小民頌焉十一年陞浙江布政司右叅政聲益著十二年春以病卒於官公天性孝友事親能養能慕自奉約甚而周恤不吝不妄受饋遺亦不問生業沒之日囊無餘資人以爲不愧其家云恭人姓延氏兩淮運使某之女也旣歸公克謹婦職姑病不良於行乃縛竹爲輿躬與諸婢舁之以適其志廉取義予甚協公意尤慈惠不欲揚羣下短長少房段產二子一女子育之劬勞過於所生公旣沒雖老且病猶以禮自閑未嘗輕踰門閭

則公之形於家者亦於是可徵矣恭人卒之日爲
弘治十六年癸亥月日公壽五十五恭人壽五十
七子四人其長晞也順天府學生次昊次景次昂
俱習舉子業女二人一適太學生余鑿一許聘石
誠李氏之墓在東安鳳巢山之陽瞻率諸弟卜九
月初一日奉恭人柩柩公墓銘曰

揭揭都憲望於李宗直道立朝不謀其躬維食不
豐載遺於公維公吉士都憲是似維國有臣都憲
有子孰產於葉不變其幅孰修之家不壞於國惟
公則然以善周旋小試於前後乃沛焉作牧大郡

惟民之天有令有識有政可傳亦有令妻善與之
齊其衷煦煦其儀凝凝豈惟助公閨門之規維族
有譜是子是父維家有模是婦是夫嗚呼公乎厥
福孔全凡厥子孫尚肖公賢

閱古王翁墓誌銘

閱古王翁卒且葬其子鑿率三弟鑰錫鎬泣請予
文予惟童子時嘗掃易洞先生丁公之門易洞清
修高節古君子也與之游者若天慵唐翁惟敬復
齋錢翁文善友雲楊翁仲魁輩而翁亦其一也天
慵涉獵經史善詩詞復齋惇實不欺業儒寄於醫

友雲恂恂口無擇言而翁以直教好聚古物聞於
人人雖人品不無少異然皆能自樹立不與庸流
同每佳時登名山水游眺一出入里巷衣冠楚楚
惡少輒驚起閉匿惟恐見其所爲噫何其盛也逮
予入仕中朝易洞先生卒而諸君亦相繼物故予
甚悼之獨翁在方以爲老成典刑比其妻亡特走
纒數千里來徵予銘今才三年而翁亦亡矣嗚呼
是何吾鄉善人之不祿哉予雖不能執筆然亦有
不得辭者蓋以重錫類之情有所不忍也又將俾
吾鄉後生小子知好古如翁者雖窮以死而君子

特與之銘則凡有識者亦將感發而好古如曩時
未可知也嗚呼予之銘翁豈予之得已哉翁諱璽
字廷信閩古其號也壽八十自其妻亡子孫皆無
恙而孫加一人焉曰諒姪欽今爲府學生恪而媚
學此又可以徵翁之澤之未艾也餘見其妻墓誌
銘曰

翁其知自修以求其珍者耶抑固自好以保其淳
者耶吾不得而知之然於所謂無懷葛天之民者
翁固庶幾其人而可使之於後不有聞乎

煦菴先生錢君墓誌銘

君諱紹字宗胤號煦菴其先汴人本武肅王之後
其家京口則自九代祖伯乙始伯乙仕宋爲殿前
點檢沒葬祠堂灣而醫業則自其五代祖愈菴始
愈菴生仲器仲器生濟民濟民二子長文美贈太
醫院院判次文哲蚤逝濟民以君繼其祀君穎敏
好讀書其醫得東垣妙處疾徐輕重應指而決百
不失一二然無間寒暑貧富有求輒往又未嘗乘
急射利用是凡有奇疾者皆不遠千里迎之比以
母老艱出乘輿買舟就治者肩摩踵接無虛日然
自守嚴甚必待人之招而後往市恩刺見絕弗爲

之郡大夫高其行往往敦與禮燕甚加敬焉君孝
弟勤儉得於天成事先極誠凡有祭享必沐浴更
衣灑掃洗滌之事畢菴肴核樽俎之設皆身親之
其薦新亦然病且劇于時子汝成當代祭君猶盥
手索祭物檢閱整頓凡禮度亦教戒不置祠堂嘗
被災君率諸子整衣冠啓告奉主櫝出雖倉卒亦
慰安如儀兄壽菴院使公以名醫被徵常以母老
爲憂君能體其志事之唯謹壽菴得盡職於朝
廷者寔賴君侍左右也當道屢欲薦而官之君以
母老不忍遠出堅辭不受壽菴爲輸粟拜散官以

榮之君治家嚴居常無笑容不喜怠惰晨起必秉
燭雖老手不釋卷最愛菊嘗以韓魏公黃花晚節
之詞揭之楣間以自警人有善言則書於壁酷嗜
書史雖殘編斷簡未嘗委棄故先世所遺什襲惟
謹病且劇猶撫卷再四致丁寧焉凡所聞所行日
籍記之人有片善耿耿不忘至有舊惡亦不追念
事有涉於悅親悅兄者雖費不惜平生直道無所
私曲人有諛者正色拒之居常接人辭氣和緩言
必自其中之所存以故人愛而重之始病即命書
遺言始劇命宣讀於衆拳拳以母老不逮養爲恨

且指其中仁義禮智信五字以授諸子終復示以
一忍字且書諸汝成掌中旣而復曰無作佛事立
汝身修汝德圖爲親之光遂卒時弘治十八年正
月十六日也享年六十有一配張氏同縣名家張
翁繼宗之女子四人長汝成次汝謙汝儉汝弟汝
弟側室楊出也女五人長適潘顯次范鑄唐可陶
良臣次聘張濟孫男三長旻次模楷孫女亦三以
正德二年五月十八日葬焦石山之原汝成以銘
請嗚呼予忍不銘君哉予少也賤君獨愛我重我
館於家使二子汝成汝謙受學其禮數甚至蓋亦

今之鮑叔也銘其奚辭銘曰
餞我乎江之北遲我乎江之麓我歸江鄉兮君幽
谷吁嗟煦菴兮命何促匪煦菴之命促兮寔吾鄉
吾人之無祿

戒菴文集卷之十六

靳文僖公文集

和

臺灣國家圖書館, NATIONAL CENTRAL LIBRARY, TAIWAN, R.O.C.

戒菴文集卷之十七

墓誌銘

明故中順大夫廣東按察司副使補齋先生
丁公墓誌銘

嗚呼貴尚忍銘我補齋先生也夫清遠之禍極矣
先生以豪傑之才紹聖賢之學中行獨復顧進未
能覺斯民退又不得明諸書以傳諸後乃不幸并
其妻孥以沒嗚呼天之無意於斯文也悲夫弘治
甲子冬十二月二十有二日戊寅先生之子同將
葬先生於長山走書速銘仲本曰不銘則道不見

子史官也知先生道德又深奚忍不踴泣而銘之
先生諱璣字玉夫別號補齋鎮江丹徒人年十八
以周易領應天鄉薦又三年舉成化戊戌進士逾
年授中書舍人雖清銜而勤慎供職不與凡等縉
紳咸以道學稱之甲辰歲除星夜殞乙巳春正元
日星晝殞有聲 詔求直言先生奏疏論治道大
要言人君以正心爲本而急務在教東宮振綱紀
正風俗慎用人重名器蘇民困理財用飭兵備反
復數千言未及時政得失且謂方士釋老近則害
治語尤峻直疏入留中群奸切齒日令邏卒伺之

無所得乃以同官公過連逮獨出先生爲普安州
判官普安遠夷去中州萬餘里非人所居人皆危
之先生怡然從一僮就道逾年以進 賀表北上
道丹徒則德容豐盛視他日頗有加焉時 皇上
初嗣位起三原王公爲吏部尚書公推重先生即
延見坐語竟日明日再欲見先生不赴乃奏記言
今日大本無急正君然非一人一日之力宜早堅
主上向道之志開進賢之路庶本正源清制治保
邦可次第舉王公躋其言將引爲吏部屬竟爲忌
者所沮轉廣信府通判未三年再提學薦皆不果

先生亦以父喪去位服闋即家授興國知州尋又以母喪去位服闋倪文毅公爲吏部尙書收拾名士起章公懋爲南京國子祭酒先生爲南京儀部郎中未四月再廷廣東按察司副使奉勅提督學政歲餘入賀至清遠峽山水暴漲時舟已發不可禦先生瘦不可免闔窓端坐與側室陳氏咸啓二子暨二女俱沒翌日屍始得猶衣冠端整不去體遠邇聞者莫不傷悼賢士劫會哭以爲斯文恨時弘治癸亥三月十五日也壽僅四十有七嗚呼痛哉先生系出宋叅知政事觀文殿學士文簡

公度之後其四世孫有諱素者官江都始自汴南徙與其子太府卿總轄公曄俱葬丹徒遂人柵寧棄建寧右衛經歷隱于鄉自號友陶父元吉友陶長子也學行高古學者尊爲易洞先生以先生貴封中書舍人先生資稟超異幼服庭訓毅然以興起斯文爲己任甫冠抗顏師席出其門者皆知以行誼相高不專事舉業其官京師陳石齋公甫方以詔至先生日接論議久乃嘆曰石齋克已功到所養甚善惜其學大類象山吾儒須內外交養知行並進斯無弊其在廣東教法以厚倫爲本以

主敬窮理爲務以修身而澤天下爲期其取士則先德行而文藝次之雖未久而士習丕變駸駸知所向云先生涵養深邃德器充完言信而行謹直內而方外長不逾中人而任道好古崇正闢邪獨立不懼蓋有萬夫之勇居易俟命視死生猶旦暮其於富貴利達漠如也儀禮久廢世莫有舉行者先生曰此周公之典也凡冠婚祭悉從之其治親喪考索周至纖采備舉然衰毀骨立見者無不感動逆浮屠老子不用鄉人至今則之愛君憂國根其天性自爲諸生時凡讀制書必拱肅雖坐必

作曰此王言也其歸自普安次辰州聞憲廟上賓北向長號三日不食朝廷每有善政聞之輒喜否則終日戚不樂甚孝大節多類此爲政以風化爲先一以誠意行之不事雕虞民故久乃信之思慕不忘普安夷酋例以黃金爲贄且飲必先以示無毒先生曰何不相信乃爾乃先飲而贄則悉却之夷酋感悅遵約束不敢專殺一人禁火葬興文教俗漸更士亦有科舉第者比還追送越數程猶泣不忍去其在廣信惠政尤多同寅有坐事者先生處之曲有恩獨丐印易牒則執不從曰